

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XXVI)3

**SOALAN BERTULIS OLEH AHLI KAWASAN SERI DELIMA
YB. SYERLEENA BINTI ABDUL RASHID**

3. Apakah polisi ataupun langkah-langkah yang akan di ambil oleh Kerajaan Negeri Pulau Pinang untuk melestarikan bidang kesenian dan muzik tempatan?

**YB. YEOH SOON HIN
MENJAWAB BAGI PIHAK Y.A.B. KETUA MENTERI**

3. Dalam usaha melestarikan bidang kesenian dan muzik tempatan, Kerajaan Negeri telah dan akan mengambil langkah-langkah seperti berikut:

Pembangunan *Penang Art District*.

Projek ini merupakan satu inisiatif Kerajaan Negeri yang diilhamkan untuk menjadi pemangkin dalam bidang industri kreatif termasuk kesenian dan muzik tempatan di Pulau Pinang. Kerajaan Negeri telah mengenalpasti sebidang tanah berkeluasan 9.2 ekar bersebelahan Gat Lebuhraya Macallum dan Lebuh raya Tun Dr. Lim Chong Eu untuk menempatkan *Penang Art District* dengan konsep bandar kontena serta dilengkapi dengan taman landskap. *Penang Art District* akan menempatkan koleksi terbesar galeri seni, muzium budaya, ruang pameran, studio seni dan muzik, sekolah seni dan bengkel seni di Malaysia. *Penang Art District* akan meningkatkan nilai seni dan budaya Pulau Pinang melalui penglibatan artis, tukang seni, pendidik dan masyarakat umum dalam program-program kesenian. Projek ini kini

dalam proses untuk mendapatkan kelulusan pelan bangunan sebelum pembinaan dapat dijalankan.

Menyokong penganjuran lebih banyak program kesenian dan muzik tempatan.

Kerajaan Negeri sedar bahawa penganjuran program kesenian dan muzik tempatan memakan belanja yang signifikan dan berkemungkinan tidak memberikan pulangan sewajarnya berbanding dengan kos perbelanjaan. Oleh itu, Kerajaan Negeri bekerjasama dengan pihak swasta dalam penganjuran program dan mempertimbangkan untuk menaja sebahagian daripada perbelanjaan.

Memelihara kesenian dan muzik tempatan melalui jemputan kumpulan persembahan dalam majlis-majlis Kerajaan Negeri.

Majlis seperti Perayaan Chap Goh Meh, Perayaan Tahun Baru Cina, majlis lawatan delegasi luar negara ke Pulau Pinang dan persidangan mempamerkan persembahan tempatan dalam acara perasmian. Kumpulan persembahan yang biasanya dijemput adalah seperti kumpulan tarian Boria, tarian India, tarian Cina, tarian Euphoria dan persembahan tarian Majlis Kebudayaan Negeri Pulau Pinang. Selain daripada kumpulan tarian profesional, pihak sekolah juga turut dijemput untuk persembahan bagi memberikan peluang kepada pelajar-pelajar sekolah menunjukkan bakat dalam seni muzik dan tarian. Melalui penglibatan pelajar sekolah, seni dan muzik tempatan dapat diwarisi dan diturunkan kepada generasi seterusnya.

Cadangan untuk menubuhkan sebuah Majlis Kesenian Pulau Pinang.

Meneliti cadangan untuk menubuhkan sebuah Majlis Kesenian Pulau Pinang yang merangkumi oleh ahli kerajaan dan golongan artis untuk merancangan pelan tempoh pendek

dan tempoh panjang untuk pembangunan kesenian negeri ini.